

OMMAVIY OFERTA

“Talaba aksiyasi” doirasida ishtirok etish bo'yicha

Mazkur Oferta (keyingi o'rinlarda — “Oferta”) “Moomkin” mas'uliyati cheklangan jamiyati (keyingi o'rinlarda - Tashkilotchi deb yuritiladi) tomonidan tashkil etilgan “Talaba aksiyasi” (keyingi o'rinlarda — “Aksiya”)da ishtirok etish va undagi shartlar bo'yicha muomila layoqatiga ega jismoniy shaxslarga (keyingi o'rinlarda — “Ishtirokchi”) O'zbekiston Respublikasi Fuqarolik kodeksi 367, 981 va 982-moddalariga muvofiq ommaviy taklif (ommaviy oferta) hisoblanadi.

Ishtirokchining ushbu Ofertada nazarda tutilgan harakatlarini bajarishi uning quyida keltirib o'tilgan shartlarga so'zsiz roziligini bildiradi (Oferta aktsepti). Oferta qabul qilingan paytdan boshlab Shartnoma tuzilgan hisoblanadi. Ushbu Shartnomada to'g'ridan-to'g'ri ko'zda tutilmagan barcha masalalarda tomonlar O'zbekiston Respublikasining amaldagi qonunchiligiga va ish muomalasi odatlariga amal qiladilar.

Ushbu taklifning amaldagi redaksiyasi tashkilotchiga tegishli Moomkin mobil ilovasi hamda uning Instagram sahifasida joylashtirilgan.

Ushbu Oferta 2025-yil 1-noyabrdan boshlab kuchga kiradi va 2026-yil 1-yanvrgacha yoki aksiya yakunlanguniga qadar amal qiladi.

1. Umumiy qoidalar

1.1. Aksiya lotereya, bahs, totalizator, qimor yoki tavakkalchilikka asoslangan boshqa o'yin emas, uning shartlari O'zbekiston Respublikasi amaldagi Qonunchiligi talablariga muvofiq keladi.

1.2. Aksiya tashkilotchisi: “Moomkin” mas'uliyati cheklangan jamiyati (keyingi o'rinlarda “Tashkilotchi” deb yuritiladi).

Tashkilotchi rekvizitlari:

STIR: 312136148

Yuridik manzil: Toshkent shahri, Chilonzor tumani, Botirma MFY, 17-mavze, 33-uy, 118-xonadon

Elektron pochta:

Telefon raqami:

2. AKSIYA O'TKAZISH VAQTI

2.1. Aksiya muddati: 2025-yil 1-noyabrdan 2026-yil 1-yanvargacha (keyingi o'rinlarda — “Aksiya muddati” deb yuritiladi).

2.2. Agar ushbu davr mobaynida “Moomkin” ilovasida 100 000 (yuz ming) nafar talaba foydalanuvchi ro'yxatdan o'tmasa, Aksiya muddati avtomatik tarzda yana 1 (bir) oyga uzaytiriladi.

2.3. Aksiya g'oliblarini aniqlash jarayoni 100 000 nafar foydalanuvchi ro'yxatdan o'tganidan so'ng boshlanadi.

2.4. Ushbu Ofertada ko'rsatilgan barcha vaqt birliklari va muddatlar O'zbekiston Respublikasi, Toshkent shahri vaqti bo'yicha hisoblanadi.

3. TASHKILOTCHINING HUQUQLARI VA JAVOBGARLIGI

3.1. Tashkilotchi Aksiyaning o'tkazish, uning natijalarini aniqlash hamda sovrinlarni topshirish tartibini mustaqil belgilash huquqiga ega.

3.2. Tashkilotchi istalgan vaqtda Aksiya shartlarini o'zgartirishga, uni muddatidan oldin tugatishga, shuningdek Aksiya to'g'risida qo'shimcha ma'lumotlarni e'lon qilishga haqli.

Aksiya shartlari bo'yicha yangilangan (qo'shimcha) ma'lumotlar Tashkilotchi tomonidan bunday o'zgartirish (yangilash) ma'qullangan kundan boshlab 3 (uch) ish kuni ichida Saytda joylashtirilishi shart.

3.3. Tashkilotchi Aksiya doirasida ishtirokchilar bilan yozma yoki og'zaki muzokaralar olib bormaslik, shuningdek Aksiya natijalari yuzasidan izoh bermaslik huquqini o'zida saqlab qoladi, agar bu ushbu Oferta yoki O'zbekiston Respublikasining amaldagi qonunchiligi bilan nazarda tutilgan hollarni istisno etmagan bo'lsa.

3.4. Tashkilotchi texnik sabablarga ko'ra (shu jumladan, lekin ular bilan cheklanmagan holda: internet aloqasidagi uzilishlar, serverdagi nosozliklar, texnik xatoliklar, uchinchi shaxslarning noqonuniy harakatlari) Aksiyaning vaqtincha to'xtatilishi yoki o'tkazilmasligi uchun javobgar emas, biroq bunday holatlar yuzaga kelgan taqdirda ularni imkon qadar tez fursatda bartaraf etish choralari ko'radi.

3.5. Tashkilotchi Aksiya ishtirokchilarining noto'g'ri yoki yolg'on ma'lumot kiritishi, shuningdek o'z majburiyatlarini bajarmasligi natijasida yuzaga keladigan har qanday oqibatlar uchun javobgar hisoblanmaydi.

3.6. Tashkilotchi Aksiya doirasida ishtirokchilarning shaxsiy ma'lumotlarini faqat ushbu Ofertada ko'rsatilgan maqsadlarda va O'zbekiston Respublikasining "Shaxsga doir ma'lumotlar to'g'risida"gi Qonuni talablariga muvofiq tarzda qayta ishlash huquqiga ega.

3.7. Tashkilotchi Aksiyaning o'tkazilishi, tashkil etilishi va natijalari uchun to'liq javobgarlikni o'z zimmasiga oladi.

3.8. Tashkilotchi tomonidan ushbu Ofertada nazarda tutilgan barcha majburiyatlar to'liq bajarilgan deb hisoblanadi, agar sovrinlar g'oliblarga belgilangan tartibda topshirilgan bo'lsa.

3.9. Tashkilotchi Aksiya davomida va undan keyin ishtirokchilarning huquqiy da'volariga faqat ushbu Oferta va amaldagi qonunchilik doirasida javob beradi.

4. AKSIYA ISHTIROKCHILARI VA ISHTIROK ETISH TARTIBI

4.1. Aksiya O'zbekiston Respublikasidagi oliy ta'lim muassasalarida kunduzgi, sirtqi yoki kechki bo'limlarda tahsil olayotgan talabalarga mo'ljallangan.

4.2. Aksiyada **18 yoshga to'lgan** va to'liq huquqiy layoqatga ega O'zbekiston Respublikasi fuqarolari — talabalar ishtirok etishlari mumkin (keyingi o'rinlarda ko'plikda "Ishtirokchilar", yakka tartibda "Ishtirokchi" deb yuritiladi).

4.3. Aksiyada ishtirok etish uchun Ishtirokchi:

- "Moomkin" mobil ilovasini yuklab olishi;
- "Moomkin" Instagram (**link**) sahifasiga a'zo bo'lishi;

- ilovada ro'yxatdan o'tishi;
- ro'yxatdan o'tish jarayonida barcha zarur shaxsiy ma'lumotlarni to'g'ri va to'liq kiritishi lozim.

4.4. Aksiyada ishtirok etish bepul va ixtiyoriy hisoblanadi.

4.5. Quyidagi shaxslar Aksiyada ishtirok eta olmaydilar:

- Tashkilotchining xodimlari;
- Tashkilotchi bilan affillangan shaxslar;
- Tashkilotchi bilan fuqarolik-huquqiy yoki boshqa munosabatlarda bo'lgan, shuningdek Aksiyani tashkil etish va/o'tkazishda ishtirok etuvchi uchinchi shaxslarning vakillari;
- Yuqorida sanab o'tilgan shaxslarning yaqin qarindoshlari;
- Fuqaroligi bo'lmagan shaxslar hamda xorijiy davlatlar fuqarolari.

4.6. Agar ushbu Ofertaning mazkur bo'limida belgilangan talablarga javob bermaydigan shaxslar Aksiyada ishtirok etgan bo'lsa, Tashkilotchi bunday shaxslarga Aksiyada qatnashish va (yoki) sovrinni olishni rad etish huquqiga ega.

4.7. Ishtirokchi o'z shaxsiy ma'lumotlarining to'g'riligini, ishonchliligini va yangiligini ta'minlash uchun mustaqil javobgar hisoblanadi hamda ushbu Ofertaning barcha shartlarini qabul qilganini tasdiqlaydi.

5. SOVRIN FONDI VA UNI O'ZGARTIRISH TARTIBI

5.1. Butun Aksiya Muddati davomida sovrinlar soni cheklangan bo'lib, u Ofertaning 7-bo'limida ko'rsatilgan miqdorni tashkil etadi.

5.2. Tashkilotchi Aksiyaning Sovrin fondini o'zgartirish huquqini o'zida saqlab qoladi, shu jumladan sovrin miqdori, tarkibiy qismi, turi va boshqa xususiyatlarini o'zgartirishi mumkin. Bunday hollarda yangi sovrin qiymati almashtirilgan sovrin qiymatiga mutanosib bo'lishi shart.

5.3. Sovrinlarning ko'rinishi, dizayni va xususiyatlari reklama materiallarida taqdim etilgan tasvirlar yoki ishtirokchilarning shaxsiy xohishlari bilan to'liq mos kelmasligi mumkin.

5.4. Aksiya doirasida sovrin sifatida taqdim etiladigan tovarlar yoki xizmatlarning sifati uchun javobgarlik ushbu tovar yoki xizmatlarni ishlab chiqaruvchi (yetkazib beruvchi) shaxs zimmasida bo'ladi.

6. G'OLIBLARNI ANIQLASH VA SOVRINLARNI TOPSHIRISH TARTIBI

6.1. Aksiya g'olibi 100 000 (yuz ming) nafar foydalanuvchi "Moomkin" ilovasida ro'yxatdan o'tganidan so'ng, tasodifiy tanlov (random) usuli orqali aniqlanadi.

6.2. Aksiya muddati 2025-yil 1-noyabrdan 2026-yil 1-yanvargacha etib belgilanadi. Agar ushbu davr mobaynida 100 000 nafar foydalanuvchi to'planmasa, Aksiya muddati avtomatik tarzda 1 (bir) oyga uzaytiriladi.

6.3. Aksiya g'oliblari Tashkilotchi tomonidan ushbu Ofertaning 3.3-bandida belgilangan talablar va umumiy Aksiya shartlari inobatga olingan holda aniqlanadi.

6.4. G‘olib(lar) “Lizaonair” (<https://lizaonair.com/giveaway/>) platformasida mavjud bo‘lgan tasodifiy raqamlar generatori orqali aniqlanadi.

6.5. G‘oliblarni aniqlash jarayoni Tashkilotchining rasmiy ijtimoiy tarmoqlari — Instagram (@moomkin.uz) va/yoki boshqa rasmiy sahifalarda jonli e‘fir (real vaqt rejimi) orqali amalga oshiriladi.

6.6. G‘olibning ismi va familiyasi Tashkilotchining rasmiy ijtimoiy tarmoqlarida e‘lon qilinadi. E‘lon sanasini Tashkilotchi mustaqil belgilaydi, biroq u Aksiya muddati yakunlanganidan keyin 10 ish kunidan oshmasligi lozim.

6.7. Aksiya g‘olibi sifatida tanlangan talabaning bir yillik o‘qish uchun kontrakt to‘lovi summasi, biroq umumiy miqdori 40 000 000 (qirq million) so‘mdan oshmagan holda, “Moomkin” tomonidan qoplab beriladi.

6.8. Agar g‘olibning kontrakt to‘lovi 40 000 000 so‘mdan kam bo‘lsa, farq summasi naqd yoki boshqa shaklda to‘lab berilmaydi.

6.9. Kontrakt to‘lovi bevosita oliy ta‘lim muassasasining rasmiy hisob raqamiga o‘tkaziladi. G‘olibga pul mablag‘lari naqd shaklda yoki uchinchi shaxslar orqali berilmaydi.

6.10. G‘olib o‘zining talabalik maqomini quyidagi hujjatlardan biri orqali tasdiqlashi shart:

- oliy ta‘lim muassasasi rahbariyati tomonidan to‘lov amalga oshirilganini tasdiqlovchi hujjat (kontrakt shartnomasi va to‘lov kvitansiyasi); yoki
- o‘qiyotgan ta‘lim muassasasi tomonidan berilgan, muhr va rahbar imzosi bilan tasdiqlangan rasmiy talabalik guvohnomasi.

6.11. Agar g‘olib talabalik maqomini belgilangan tartibda tasdiqlamasa yoki Aksiya shartlariga zid xatti-harakatlar aniqlansa, Tashkilotchi sovrinni topshirishdan bosh tortish huquqiga ega.

6.12. Agar Aksiya g‘olibi sovrinni olish uchun zarur bo‘lgan hujjatlarni imzolashdan yoki ularni taqdim etishdan bosh tortsa, shuningdek, boshqa yuridik ahamiyatga ega harakatlarni amalga oshirmasa, bu holat g‘olibning sovrinni olishdan ixtiyoriy ravishda voz kechganligi sifatida e‘tirof etiladi.

7. SOVRIN VA UNI TOPSHIRISH TARTIBI

7.1. Aksiya g‘olibi sifatida tanlangan talabaning bir yillik o‘qish uchun kontrakt to‘lovi, biroq umumiy miqdori 40 000 000 (qirq million) so‘mdan oshmagan holda, “Moomkin” tomonidan qoplab beriladi.

7.2. Sovrin faqat g‘olib talabaning nomiga to‘lanadi. Biroq, istisno tariqasida, kontrakt to‘lovi g‘olibning 1-darajali qon-qarindoshlari — ota-ona, aka-uka yoki opa-singil nomiga ham yo‘naltirilishi mumkin.

7.3. Agar g‘olib kontrakt to‘lovini aksiya e‘lon qilinishidan avval yoki uning davomida allaqachon amalga oshirgan bo‘lsa:

- keyingi o‘quv yilidagi kontrakt to‘lovi qoplanadi;
- agar g‘olib bitiruvchi kursda o‘qiyotgan bo‘lsa va keyingi o‘quv yilida kontrakt to‘lovi mavjud bo‘lmasa, sovrin 1-darajali qon-qarindoshiga yo‘naltiriladi.

7.4. Aksiya doirasida Umra safari g'olib uchun qo'shimcha sovrin sifatida taqdim etilishi mumkin.

7.5. Umra safari sanasi g'olib e'lon qilingan kundan boshlab 1 (bir) oy ichida belgilanadi.

7.6. "Moomkin" g'olibning bir martalik viza olish xarajatlarini qoplaydi. Agar g'olib birinchi urinishda vizani ololmasa, keyingi ariza topshirish bilan bog'liq xarajatlar ishtirokchining o'zi tomonidan qoplanadi.

7.7. G'olib viza ololmagan taqdirda, Umra sovrini g'olibning 1-darajali qon-qarindoshiga o'tkazilishi mumkin.

7.8. G'olib o'zining talabalik maqomini quyidagi usullardan biri orqali tasdiqlashi shart:

- tegishli oliy ta'lim muassasasi rahbariyati huzurida to'lovni amalga oshirish uchun kontrakt shartnomasi va to'lov kvitansiyasini taqdim etish orqali;
- o'qiyotgan ta'lim muassasasi tomonidan joriy yil uchun berilgan, muassasa muhri va rahbar imzosi bilan tasdiqlangan talabalik guvohnomasini taqdim etish orqali.

7.9. Agar g'olib talabalik maqomini belgilangan tartibda tasdiqlay olmasa, Tashkilotchi sovrinni topshirishdan voz kechish huquqiga ega.

8. SHAXSIY MA'LUMOTLARNI TO'PLASH VA QAYTA ISHLASHGA ISHTIROKCHINING ROZILIGI

8.1. Aksiyada ishtirok etish fakti Ishtirokchining ushbu Ofertada belgilangan barcha shartlarga, shu jumladan, shaxsiy ma'lumotlarini ("SHM") to'plash, saqlash va qayta ishlashga roziligini erkin, aniq, xabardor va ongli ravishda berganligini bildiradi.

Ishtirokchi ushbu rozilikni "Moomkin" platformasi (keyingi o'rinlarda — Tashkilotchi)ga o'z shaxsiy ma'lumotlaridan quyidagi maqsadlarda foydalanish huquqini berish orqali ifodalaydi:

- Aksiya ishtirokchilarini aniqlash, g'oliblarni tanlash va ularga sovrinlarni yetkazish;
- G'olib(lar)ni xabardor qilish, kommunikatsiya o'rnatish va hujjatlarni rasmiylashtirish;
- "Moomkin" ilovasi foydalanuvchilari faoliyatini tahlil qilish, xizmatlar sifatini yaxshilash;
- Tashkilotchining reklama, marketing va axborot kampaniyalarini o'tkazish;
- Soliq va buxgalteriya hisobotini yuritish;
- O'zbekiston Respublikasi qonunchiligi talablariga muvofiq boshqa maqsadlarda.

8.2. Ishtirokchi quyidagi shaxsiy ma'lumotlarining qayta ishlanishiga rozilik beradi:

- familiyasi, ismi, otasining ismi (agar mavjud bo'lsa);
- tug'ilgan sana;
- individual identifikatsiya raqami (IIR);
- aloqa ma'lumotlari (mobil telefon raqami, elektron pochta manzili, yashash manzili);
- "Moomkin" ilovasida ro'yxatdan o'tish paytida ko'rsatilgan foydalanuvchi identifikatori va akkaunt ma'lumotlari;
- sovrinlarni yetkazib berish uchun zarur bo'lgan qo'shimcha ma'lumotlar;
- Ishtirokchi tomonidan ixtiyoriy ravishda taqdim etilgan boshqa ma'lumotlar.

8.3. Ishtirokchi shaxsiy ma'lumotlarini avtomatlashtirilgan va avtomatlashtirilmagan usullar orqali quyidagi harakatlarga rozilik bildiradi:

- yig'ish, qayd etish, tizimlashtirish, to'plash, saqlash;
- yangilash, o'zgartirish, foydalanish, uzatish (shu jumladan, Tashkilotchi vakolat bergan uchinchi shaxslarga);
- bloklash, o'chirish, yo'q qilish;
- shuningdek, O'zbekiston Respublikasi qonunchiligiga muvofiq holda transchegaraviy uzatish (xorijiy serverlarda joylashgan texnik infratuzilmalarga) orqali qayta ishlash.

8.4. Ishtirokchi Aksiyada ishtirok etish davomida o'z shaxsiy ma'lumotlarining to'g'riligini, dolzarbligini va ishonchligini ta'minlash majburiyatini oladi. Tashkilotchi noto'g'ri yoki yolg'on ma'lumotlar taqdim etilishi natijasida yuzaga kelgan oqibatlar uchun javobgar emas.

8.5. Ishtirokchilarning shaxsiy ma'lumotlari ushbu Ofertada ko'rsatilgan maqsadlarga erishish uchun zarur bo'lgan muddat davomida saqlanadi va qayta ishlanadi. Ma'lumotlar maxfiy hisoblanadi hamda O'zbekiston Respublikasining amaldagi qonunchiligi, xususan, "Shaxsiy ma'lumotlar to'g'risida"gi 2019-yil 2-iyuldagi 547-son Qonun talablariga muvofiq tarzda himoyalanaadi.

8.6. Aksiya yakunlanganidan so'ng, Tashkilotchi yoki uning vakolat bergan shaxslari ma'lumotlarni qonunchilikda belgilangan tartibda o'chiradi yoki yo'q qiladi.

8.7. Ishtirokchi o'zining roziligini istalgan vaqtda Tashkilotchiga yozma murojaat yuborish orqali bekor qilish huquqiga ega. Biroq, bunday hollarda Tashkilotchi Ishtirokchini Aksiyada ishtirok etishdan chetlashtirish huquqini o'zida saqlab qoladi.

9. SOVRIN OLISHNING QO'SHIMCHA SHARTLARI VA G'OLIBNING MAJBURIYATLARI

9.1. Ishtirokchi Aksiyada g'olib deb topilgan taqdirda, Tashkilotchi tomonidan taqdim etilgan sovrin (sertifikat, kuponlar to'plami yoki boshqa mukofot shakli) bilan birgalikda rasmiy fotosuratga tushishi lozim.

9.2. G'olib mazkur fotosuratni Instagram o'z shaxsiy sahifalariga joylashtirishi talab etiladi.

9.3. Ijtimoiy tarmoqlardagi ushbu postlarda G'olib tegishli teglar yordamida Aksiya Tashkilotchisining rasmiy sahifalarini belgilashi kerak.

9.4. G'olib sovrinni olgandan so'ng, Aksiya bilan bog'liq ijobiy taassurotlari haqida qisqa post yoki "story" joylashtiradi. Ushbu materiallarda Tashkilotchining korporativ sahifasi belgilanishi va Aksiya nomi ko'rsatilishi kerak.

9.5. G'olib Tashkilotchi tomonidan taqdim etilgan promo (brend) kiyimida yoki atributikasida suratga tushishi mumkin, agar bunday shart Tashkilotchi tomonidan qo'yilgan bo'lsa.

9.6. Ushbu majburiyatlarni bajarmaslik yoki soxta (noto'g'ri) ma'lumot taqdim etish holatlari aniqlanganda, Tashkilotchi sovrinni bekor qilish, g'olib maqomini qayta ko'rib chiqish yoki ushbu Ofertada nazarda tutilgan boshqa choralarni qo'llash huquqiga ega bo'ladi.

10. TASHKILOTCHINING JAVOBGARLIGI VA JAVOBGARLIKNI CHEKHLASH

10.1. Tashkilotchi quyidagi hollarda javobgar emas:

- Ishtirokchining Aksiya shartlarini, jumladan, sovrinni olish bilan bog‘liq majburiyatlarni bajarmaganligi yoki o‘z vaqtida bajarmaganligi uchun;
- Ishtirokchining ushbu Ofertaning mazmuni va Aksiya natijalari bilan tanishmaganligi uchun;
- Aksiya davomida Ishtirokchiga yuborilgan xabarlar, bildirishnomalar, qo‘ng‘iroqlar yoki elektron xatlar texnik sabablarga ko‘ra yetib bormagan hollarda (jumladan, Internet, mobil aloqa, pochta aloqasi yoki firibgarlik holatlari tufayli);
- Ishtirokchi tomonidan sovrinni olish uchun zarur bo‘lgan ma‘lumotlar to‘liq yoki o‘z vaqtida taqdim etilmagan hollarda;
- Ishtirokchining shaxsiy yoki aloqa ma‘lumotlari noto‘g‘ri, to‘liq bo‘lmagan yoki o‘zgargan holatlarda;
- Aksiya o‘tkazilishida yoki sovrinlarni topshirishda Tashkilotchining nazoratidan tashqarida yuzaga kelgan texnik nosozliklar (mobil aloqa operatorlari, Internet provayderlaridagi uzilishlar, texnik xizmat ko‘rsatish va boshqalar) sababli yuzaga kelgan holatlar uchun;
- Aksiyada ishtirok etish yoki sovrinni olish bilan bog‘liq ishtirokchining har qanday xarajatlari, yo‘qotishlari yoki zararlar uchun;
- O‘zbekiston Respublikasi qonunchiligiga muvofiq fors-major holatlari (tabiiy ofatlar, pandemiyalar, urush harakatlari, davlat organlari qarorlari va boshqalar) yuzaga kelganda;
- G‘olib tomonidan sovrinni olish uchun zarur bo‘lgan hujjatlarni taqdim etish yoki imzolashdan bosh tortilgan hollarda;
- G‘olibda shaxsni tasdiqlovchi hujjatlar yoki oliy ta‘lim muassasasida o‘qiyotganligini tasdiqlovchi rasmiy hujjatlar mavjud bo‘lmagan taqdirda.

10.2. Aksiyada ishtirok etish bilan bog‘liq barcha xarajatlar (shu jumladan, Internet trafik, mobil aloqa, ma‘lumot almashish, xaridlar va boshqa qo‘shimcha to‘lovlar) ishtirokchining o‘z hisobidan amalga oshiriladi.

10.3. Tashkilotchi sovrinlarni olish huquqi bilan bog‘liq bahsli vaziyatlarda yakuniy qarorni mustaqil ravishda qabul qilish huquqiga ega. Tashkilotchining qarori yakuniy hisoblanadi va u qayta ko‘rib chiqilmaydi.

10.4. “Moomkin” ilovasining yoki uning texnik infratuzilmasining (mobil dastur, serverlar, to‘lov tizimlari, ro‘yxatdan o‘tish jarayoni va boshqalar) ishlashida yuzaga kelgan texnik nosozliklar, dasturiy xatoliklar, ma‘lumotlar bazasi yoki Internet aloqasi uzilishlari sababli Aksiya jarayonida yuz beradigan har qanday uzilishlar, kechikishlar yoki xatoliklar uchun Tashkilotchi javobgar hisoblanmaydi.

Bunday holatlar Aksiyani bekor qilish, g‘olibni aniqlash natijalarini o‘zgartirish yoki ishtirokchilar oldida kompensatsiya to‘lash majburiyatini yuzaga keltirmaydi.

11. Yakuniy qoidalar

11.1. “Moomkin” tashkilotchi sifatida aksiya shartlariga o‘zgartirish kiritish, bekor qilish yoki sovrinlar sonini o‘zgartirish huquqiga ega.

11.2. Ishtirokchi ilovada ro‘yxatdan o‘tish orqali mazkur ofertani to‘liq o‘qib chiqqanini va uning barcha shartlariga roziligini bildiradi.

11.3. Yakuniy g‘oliblar e‘lon qilingach, 5 ish kuni ichida ular bilan bog‘laniladi. Agar bu muddat ichida g‘olib bilan bog‘lanib bo‘lmasa, sovrin zaxira g‘olibga o‘tkazilishi mumkin.

12. REKVIZITLAR

Tashkilotchi:

Mas'uliyati cheklangan jamiyat "MOOMKIN"

Manzil: Toshkent shahri, _____

INN (STIR): _____

Telefon: +998 ____ ____ ____ ____

Elektron pochta: